



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :

f Tir Yimyim

Instagram tirymyim@aolima

YouTube tir yimyim

TAPAK 7



PM Modi-i Ahom general Lachit Borphukan indang aibelena jembi

Covid mapang India-i linük 150 nem teyari agütsüogo



VOL. XVIII NO. 148 (ADOK 148) DIMAPUR

AMUNGNÜ (SUNDAY)

METSÜREMI (MARCH) 14, 2021

₹ 5.00

DoHFW-i online submission mapang atsülangtsür

Dimapur, March 13 (TYO): Department of Health & Family Welfare-i common Scholarship portal kübok online submission mapang atsülangba osang metetdaksüogo.

Kaketshirtem aser rejutemi online submission asütsü atema March 15, 2021 tashi mapang atsülangtsür aser ibaji <https://Scholarship.nagaland.gov.in> nung inyaktsü, ta parnokisa ashi.

NPSC-i AA, PIO aser APIO shimogo

Dimapur, March 13 (TYO): Nagaland Public Service Commission Nagaland (NPSC)-i Appellate Authority, Public Information Officer aser Assistant Public Information Officer shimba osang metetdaksüogo.

i) Appellate Authority (AA)
John Tsulise Sangtam, NCS Secretary,
Nagaland Public Service Commission
Nagaland, Kohima.

ii) Public Information Officer (PIO)
Kelhouseto Nakhro
Deputy Secretary,
Nagaland Public Service Commission
Nagaland, Kohima.
iii) Assistant Public Information Officer (APIO)
Akala Jamir
Under Secretary,
Nagaland Public Service Commission
Nagaland, Kohima.

Meghalaya Congress-i CM Conrad Sangma anema privilege motion benoktsü

Shillong, March 13 (Agencies): Meghalaya chief minister Conrad K Sangma-i 2007 küm NTPC den tenangzüktep agiba indang osang assembly nung tiyazü ashiba atema opposition Congress-i pa anema privilege motion ka benoktsü ta shiogo.

Chief Minister-i assembly nung züngsemtem osang tiyazü agi anisatsü merang ta taoba chief minister aser Leader of Opposition Mukul Sangma-i ashi.

Taoba Congress-i aniba sorkari 2007 küm NTPC den power alitsü atema PPA nung sign asüba indang osang Chief minister-i asaa tiyazü metetdaksü, ta paisa ashi.

Tarutsü nung iba ama inyakyim noktangtsü atema onoki

chief minister anema privilege motion ka benoktsü, ta Mukul Sangma-isa shisem.

Chief minister-i state nung alirtem dang state sorkari NTPC nem itashia Rs 11 crore agütsüsa aküm ta iba tiyazü osang sangoktsü.

"Chief minister Conrad-i 2008-2009 tsüngda power minister inyakdang kechiba NTPC den PPA magientet?" ta Leader of Opposition Mukul-isa asüngdang.

"Parnoki iba PPA ya majung ta ashi aser ibaji September 2007 nung sign asü. 2008-09 tsüngda Conrad K Sangma ya Power Minister inyak. Anungji pai iba PPA zünger asütsü saka kechiba magien?" ta pai ashi.

ZORO-i Myanmar sorkar anema tenokdangba agütsütsü akhanger

Aizawl, March 13 (Agencies): Zo Reunification Organisation (ZORO)-i President Ram Nath Kovind aser Prime Minister Narendra Modi dang Myanmar nung mitkartemi ketdangsüba sorkar anema tenokdangba agütsütsü ayongzüko.

ZORO ya Mizoram nung amenoka Chin-Kuki- Mizo-Zomi kintem indang telok lir. Parnok ya India, Bangladesh aser Myanmar linüktem nung prokshia lir.

Mizoram state governor P.S. Sreedharan Pillai ajanga parnok shiditemji yokogo.

Myanmar mitkartemi meimchir temeten anema inyakba aser sorkar atsüngdokba atema India sorkari tenokdangbatem agütsütsü ta ZORO-i shidi nung metetdaksü.

Myanmar nung democracy tensa bener arutsü aser state counsellor Aung San Suu Kyi, President U Wint Myint aser

National League for Democracy (NLD) lennirtem chioaktsü atema India sorkari yariteptsü ta parnokisa ashi.

Myanmar nungi jena arurtem meyipa meyoktsü saka parnok India nung jenokdaksütsü aser teyrai balala agütsütsü, ta ZORO-isa ayongzü.

Parnokisa NDA sorkar dang kidanger linük nung yimten tebilemtsü bentettsü atema yariteptsü ashi.

"Tai maketba sensotem kümzüksü aser alimai aginüba ama democracy pusemtsü atema Centre sorkari mapa inyaktsü" ta ZORO-isa metetdaksüogo.

Mizoram kübok district 6-Champhai, Lawngtlai, Siaha, Saitual, Hnahthial aser Serchhip temi Myanmar kübok Chin state den kilometer 510 agi artsütepa lir.

Mizoram nung Mizo nunger aser Myanmar nung Chin nunger sendaktepa lir.



Wokha town nung Ao Baptist Arogo Wokha lanurtemi traffic barricades yanglutsür traffic police nem tenla agütsüba noksa nung angur. Wokha town nung küm shia Wokha town ajungtsü atema Ao arogoi mapa tajung balala inyaktsür. (Wokha, March 13, 2021).

Nagaland sorkari HSLC & HSSLC tatidang atema SOPs latettsür

Dimapur, March 13 (Agencies): Nagaland nung High School Leaving Certificate (HSLC) aser Higher Secondary School Leaving Certificate (HSSLC) tatidangtem agitsü atema sorkari Standard Operating Procedures (SOPs) metetdaksüogo.

Kaketshirtem, tesayurtem, staff aser sendaktepa alirtem kümzüka ayutsü atema stae sorkari SOPs latettsüogo.

Door handles aser railings dena examination centre ajak mozü agi merüktettsü. Ano,

matamabensar kaketshirtem asoshi sticks aser wheelchairs ajak mozü agi merüktettsü, ta SOPs nung shia lir.

Tatidang agidak medical room renema ayutsü aser item nung nüngdakba mozütem den face masks aser bedsheets temerük ayutsü. Rongdak nüngdak adokdang yariteptsü atema doctor ka renema ayutsü ta state sorkari metetdaksüogo.

Tatidang agidak Nagaland Board of School Education (NBSE)-i lateta aliba ama kaketshirtem amentsü atema

renemtsüla aser kaketshirtem atema canteen melapoktsü, ta sorkarisa ashi.

Kaketshirtem tsüngda tepila ayutsüla aser answer booklets o question papers agütsüdag kümdangtsüla. Kaketshirtemisa stationeries lemsatapa mamshitsü aser hand sanitizer den tzü tajemtsü abentsüla ta SOPs nungsa metetdaksüogo.

School campus telungi tsüraburtem marudaksütsü aser examination centre kima nung osangtem sayua ayutsü ta SOPs nungsa shia lir.

COVID-19 Nagaland: Nisung 4 dak putet; 14 anepaludar

Kohima, March 13 (TYO): Honibarnü Nagaland nung nisung 4 dak COVID-19 aliba putetogo aser parnok züngsema nisung ajak agi 12,225 kümogo.

"Tanü Kohima nung nisung 4 dak COVID-19 putet" ta Health & Family Welfare Minister S Pangnyu Phom-i metetdaksü.

"Nisung 12,225 rongnungi parnok 11,966 taneptsü nguogo aser tang nisung 14 anepaludar. Nagaland nung taneptsü angur 97.7% lir" ta Health & Family Welfare Director, Dr Denis Hangsing-i metetdaksü.

Nagaland nung COVID-19 puteter nisung 91 süogo saka

parnok 10 bo tanga timtem ajanga asü. Külen nisung 154 tanga state temi ogo, ta paisa ashi.

Tang anepalurtemji Kohima nung 13 aser Mokokchung nung 1 lir, ta Dr Hangsing-isa shisem.

"Nagaland nung COVID-19 alitsü akok ta temolung melemba sample 1,33,696 tendangogo. RT-PCR ajanga sample 75,234, TrueNat ajanga sample 37,475 aser Rapid Antigen Test ajanga sample 20,987 tendang," ta paisa metetdaksü.

Nagaland nung Covishield dose 53,878 agütsüogo:

Hokolbar tashi nung Nagaland nung nisung 44,467 nem COVID-

19 dose 53,878 agütsüogo.

Vaccine agirtem rongnung teintet rogo 3,471 aser arishi küm 45 ser tema nisung 616 dena lir, ta State Immunization Officer Dr Ritu Thurr-i ashi.

Covid vaccine agirtem rongnung frontline workers 29,345 aser healthcare workers 11,035 lir, ta Dr Thurr-isa ashi.

Healthcare workers 6,491 aser frontline 2,920-i COVID-19 vaccine dose anaprong agiogo, ta paisa shisem.

Mozü agirtem rongnung temang nung timtem adokba osang kecha mali, ta Dr Thurr-isa metetdaksü.

Centre-i Myanmar nungi jena arurtem noktangtsü tuyur

New Delhi, March 13 (Agencies): Union Home Ministry-i Northeast state tem dang Myanmar arrtsü kanga junga anüktsü atema tetuyuba agütsüogo.

Home Ministry-i Manipur, Mizoram, Arunachal Pradesh aser Nagaland state sorkartem dang Myanmar nungi jena arur kar humanitarian grounds nung dang agizüktsüla ta shiogo.

State pezü nung sorkartem dang arrtsü kanga junga anüktsü shiogo ta home ministry ketdangsür kati metetdaksü.

"India sorkari Myanmar nung atalokba osang meteta lir saka

nisung ajak India-i maitdaksütsü" ta home ministry-i shidi nung shia lir.

Tawa tu Manipur chief minister N Biren Singh-i Defence Minister Rajnath Singh den ajurutepdang iba tebilemtsü khuret atema süoki ia bilemba lemsatapa aser Centre sorkari molungra Myanmar nungi jena arurtem jenokdaksütsü renema lir ta ashi.

Myanmar nung nisung 3 asü
Yangon, March 13 (Agencies): Hokolbar aonung Mandalay nung sepaitemi lungkak aiterem anema mapa inyakdang nisung 3

asü.

Osang angazükba agi iba lendong nung nisung 20 yiru.

Mitkartemi sorkar atsüngdokba sülen lungkak aйдang asür nem akhüm tetushi agüja sentong kecha magitsü tenokdangba agüja lir.

February 1, 2021 nü sorkar atsüngdokba sülen mitkartemi lungkak aiterem noktangtsü atema sepa aika mapa lemozükja lir.

Külen, Myanmar nunger nisung meyrjang aikati maneni lungkak aiter aser civilian lennir Aung San Suu Kyi chioaktsü atema tahangba agütsür.

All Ward Union Mkg Town yimkong mungdang osang



All Ward Union Mokokchung Town menden toktsürtem aser tasen agizükertem külemi tangokba noksa nung angur. Mokokchung, March 13, 2021 (Inset: Mokokchung DC, Limawabang Jamir)

Mokokchung, March 13 (TYO): All Ward Union Mokokchung Town (AWUMT) pur yimkong mungdang Marc 13, 2021 nü yangi Arkong Ward Community Hall Mokokchung nung takok ngua agiogo.

Tanü iba sentong nung meraketsür, Mokokchung Deputy Commissioner, Limawabang Jamiri jembidang, AWUMT tenzüker Mokokchung town küm 40 tashi tensa tia balala tizükteta arudaki aser iba telok yagi Mokokchung town nüburtem atema dang masü saka Ao kin songjen atema mapa tajung jenti inyakba ngua pelaba lemsatep.

2020 küm tenük agi manguba Covid-19 wara den tongpang raradang, AWUMT teyari ajanga maparen aika takok ngua inyaktetogo aser Mokokchung district nungbo iba wara nüburtem rongnung menashia aoba aser lendong tulu atalokba kecha maliasü, ta Mokokchung DC-isa pelaba metetdaksü.

2020 küm North-East nung

netsüng yongsük meyi tenem kübok aliba yimti rongnung Mokokchung town temerükriba konang nguogo, aji oda, iba senpetji ano tanaben agizüksüsa ward ajaki lungjemer merangtsü asoshi paisa mepishia metetdaksü.

Yimsüsüba mendenji temeshi lir, anungji, tarak meketi yimsü asütsü asoshi pai tayongzükbaka agütsü. "Lenir ka akümtsü asoshi kilir shisatsü adentsüla. Nisung kwikati ni tenzüker ta masü saka ni nisung kwi tenzüker", ta asüba tangatetba nung nübur tenzüksü asoshi paisa shisem.

Paisa Mokokchung nung lenmang, light aser tzü tebilemtsü dak sentakba nung tang teinyakdak mapatong kar lemsatepba den inyaka aodang tebilemtsü ajuruba tem aser wadang balala nungji AWUMT-i shilem agitsü asoshi ajungshia liasü.

Iba sentong nung Mokokchung town kübok ward 18 nungi ward yimsüsür

(executive committee) aser Gaon Bora-tem aden.

2021-2023 kümsük atema

All Ward Union Mokokchung Town

mendenpur itemi shimtet:

- Tir (President): L i m a n u n g s a n g (Mokokchung yim), Chairman, Sungkomen Ward
- Tatong Tir (Vice President): Lanuakum (Maromung), Chairman, Salangtem Ward
- Tongti Zülur (General Secretary): R. Jongpongtemjen (Longsa), Secretary, Arkong Ward
- Repsem Zülur (Asst. General Secretary): Takusungba (Kinunger), Secretary, Yimyu Ward
- Sen Zülur (Finance): M. B e n d a n g y a n g e r (Chungtia), Secretary, Dilong Ward
- Kimen (Treasure): Longertemjen (Ungma), Chairman, Aongza Ward.

Mokokchung nung Piggery Breeding Unit semzüksü



Mokokchung, Metsüremi/March 13, 2021: Brehostibarnü, DAY-NSRLM Mokokchung-i achaayanga 'Piggery breeding unit' semzükbaka sentong nung tetushi tesemdang, Shisalen agütsür aser sentong nung shilem agirtem tangokba noksa ka yangi angur.

Mokokchung, Metsüremi/March 13, 2021 (TYO): Brehostibarnü, BMMU Chuchuyimlang Block kübok Piggery breeding unit ka semzüksüogo. Iba unit lapokba sentong nung M. Toshimongla Kichu, Project Director DRDA Mokokchung

tesemdang liasü.

Livelihood Coordinator BMMU Chuchuyimlang ajanga iba piggery unit indang asalentong tem telok dang metetdaksü. Kasa mapang, tetushi tesemdang M. Toshimongla Kichu aser village council nungi lenir kari o jembi.

Parity VLO tir-i tepela anküp o jembi aser Chuchuyimlang Village Baptist Arogo Sannükeri iba unit meshiteta sarasademtsü.

Livelihood Enhancement initiative DAY-NSRLM, Department of Rural Development, Government of Nagaland-i senotsü teyari agüja iba project inyakoyo.

NSCN (R)-i 'Milei Ngi' benjung salem lemsatep

Dimapur, Metsüremi/March 13 (TYO): NSCN/GPRN (Reformation)-i Zeliang Naga nungertem den 'Milei Ngi' benjung salem lemsatepogo. Iba benjung ya March ita tom nung amunger.

'Milei Ngi' ya meshitetba benjung ka lir koba Zeme nungertemi amunger. Benjung mapang sobaliba sobutsü sobur aiür aser asangur chanutemi sobaliba tsüngsang sayaa amunger.

Tsüngsang aser ken dak alia

benjung nung melangtepba (wrestling) aser jokshishiba (long jump) amala sobaliba saisapong balala asayaa amunger.

Benjung longso longbena amungba den iba benjung ya Naga nunger tsüngda tesendaktep takangba yanglushiba mapang ka aser telungjem nung tejakdangi aoba mapang ka südakjang, ta NSCN/GPRN (Reformation) MIP sangdong ka ajanga lemsatep.

NCC-i Aazadi Ka Amrut Mahotsav sentong amenokogo

Kohima, Metsüremi/March 13 (TYO): Sabarmati Ashram, Ahmedabad nungi Ato Kilonser Narendra Modi-i 'Padyatra' (Freedom March) tenzüksüba den 'Azadi Ka Amrut Mahotsav' sentong semzüksüba sülen, India nüjiso ngur küm 74 ajungba nüngtem nung India sorkari 2022 küm August 15 matong tsüngda hopta 75 jelia sentong balala ayongzüka agitsü.

Iba dak sendakba nung National Cadet Corps-ia 2021 küm March ita nungi tenzüka linük ajunga nung itashia lokti inyakyim kaka ajungkettsü atem sentong yangluogo.

Linük yangertem takok sayatsü atema linüki jenjang agiba ataloktsü asoshi khuret abentsü atema lanurtem ajungmesotsü asoshi Freedom Struggle, Ideas at 75, Achievements at 75, Actions at 75 aser Resolves at 75 dak ajemdaker National Cadet Corps-i tanü yimti 75 nung linük nung nüngtugu nisung 75 kerakyanglu matsüngdang akhüm tetushi agütsüogo, koba March ita inyakyim asütsü.

Item nisungtemi

ajangtetbatem indang cadets temi, awareness lectures, nukkad nataks, sangro ajanga tangazükba agütsüogo aser parnok takoktem poster aser banner tem ajanga saya liasü.

Taruba itatem nung National Cadet Corps-i, linük ajunga nung India nüjiso ngur küm 75 ajungba, koba 2022 küm August ita 15 nü amungsü ali, iba atema jeli renemshi sentong ama Social Service aser Community Development sentongtem ajungkettsü

National Cadet Corps ya linük nung premier uniformed youth organization ka lir aser linük kümetetba mapang nungi linük yangerba nung tongtibang shilem agiogo. Iba lokti ajanga lanurtem aika yimya yimpong meleshtsüba den NCC omen 'Unity and Discipline' lenmang sayua taküm melenshtsüogo. Corps-i water conservation, environment protection, digital awareness aser Swachhta Abhiyan amala sentongtem lokti nem metetdaksüba nung tenüng asangtsü langa inyaka arudar, ta PRO (Def) Lt Col Sumit K Sharma-i sangdong ka ajanga metetdaksü.

CMO Peren-i metetdaksür

Dimapur, Metsüremi/March 13 (TYO): March 5 nü District Task Force senden nung lemtetba onük mezüngbuba dak ajemdaker CMO Peren, Dr. Hatlhing Hangsing-i, CHC Jalukie nung tenüngdakba medical service tem ajak tenzüksü aser iba den külemi lemtetba ama COVID Ward balaka amenoka inyakshangshitsü ta metetdaksüogo.

Maneni laisa, COVID Hospital duty nung aliba staff

tem dang parnok tata tesemi aotsü tetuyuba agütsüogo.

Ajisüaka roster memeleshtsü aser parnok standby team tem ama maneni inyakshangshitsü. District nung COVID tashidak agi shirangertem potetra standby nung aliba team tem tenüngdakba apir mapa inyakshangshi tenzüksü. Iba tetuyuba ya March 9 nü nungi benoka inyaksü, ta kasa sangdong ajanga metetdaksü.

Bhandari nung Neighbourhood Youth Parliament sentong agi

Dimapur, Metsüremi/March 13 (TYO): India nüjiso ngur küm 75 ajungba dak sendakba nung Nehru Yuva Kendra, Wokha-i ayongzüka March 12 nü Wokha District kübok 7th NAP unit school, Bhandari nung Neighbourhood Youth Parliament sentong agiogo.

Sentong nung tesayur Tsenlamo Ovung-i "India's Freedom Struggle with life

journey philosophy of Mahatma Gandhi and Subhash Chandra Bose", onük nung o jembi aser tesayur Subodh Kumar Singh-i, "Role of youth in Nation building and community development" aser "Contemporary confronting issues on local community" onük nung ajemdaker jembi.

Iba sentong ya National Youth Volunteer, Longsubemo Kikon lenisüba kübok agia liasü.



Assam kübok Nagaon District nung Union Minister of Textiles Smriti Irani-i party candidate Anil Saikia atema nüboyimba sentong ka nung adendang agiba noksa angur. (Nagaon, March 13)

Assam Paper Mill mapa inyaker ka itasen manguba agi asü

Nagaon, March 13 (Agencies): Anena aliba Nagaon paper mill nung mapa inyaker Imran Ali Thakuria Honibarnü temesen nung timtem ka ajanga süogo. Pa asüba züngsema tang tashi nung Nagaon paper mill nung mapa inyaker nisung 83 süogo.

Tesüüba ita 50 tashi itasen manguba agi Assam paper mill nung mapa inyaker Ali-i mapang shitak nung temang anepalu mesütet ta pa den külemi inyaker kati ashi.

"Centre aser state sorkartem tai ajanga Ali asü" ta Joint Action Committee of Recognized Unions, (JACRU) Nagaon and Cachar Paper Mills, Assam president Manobendra Chakraborty-i tai tongloksü.

"Kechiba Assam nung paper mill tem nung mapa inyaker tem dak taochi mesayui tepseter? Iba ya 2016 küm Assam nungeri BJP nem vote enoktsüba ajanga lir. Küm 70 tashi tiyazü shia aruogo anungji Assam nung industries shibanga aliba meyrjang 32 lapoktsütsü ta Modi-i tiyazü tenangzükba agiba ajanga iba ya atalok" ta paisa metetdaksü.

"Prime minister aser chief minister lenisüba kübok India sorkar indang HPC-i nisungtem tepseter. Onoki nübortem dang nisung tepsetba sorkar magizüktsü aser takümtem kümzüktsü mepishir" ta Manobendra Chakraborty-isa ashi.

Assam nung shibanga aliba

paper mill ana nung mapa inyaker nisung 1,800-i parnok nem itasen magütsüba anema lungkak aitba sayua, BJP nem vote magütsütsü osang sangoktsüogo.

Taoba assembly election nung BJP-i paper mill ana lapoktsütsü ta nangzük saka ibaji meinyakba atema tejashi nung parnok iba telemtetba agi.

2016 Assembly elections matongdang BJP-i Hailakandi nung Hindustan Paper Corporation indang Cachar Paper Mill aser Jagi Road nung Nagaon Paper Mill lapoktsü nangzükba liasü.

Ajisüaka, BJP-i aniba sorkar akümba sülen paper mill ana melapoktsür aser iba ajanga mapa inyaker temi timtem tuluba ajurur.

PM Modi-i Ahom general Lachit Borphukan indang aibelena jembi

Guwahati, March 13 (Agencies): Ahom general Lachit Borphukan ji Assam nung nüjiso atema rarar ka liasü ta Prime Minister Narendra Modi-ibo bilemer.

Hokolbarnü Prime minister Modi-i Assam aser Northeast nung nüjiso atema rarartem indang jembidang Gomdhar Konwar, Lachit Borphukan aser Serat Sing nungertem

tetshi. 'Azadi Ka Amrit Mahotsav' (India@75) sentong tenzüksüadang Prime Minister-i Sabarmati Ashram, Ahmedabad nung iba o ya kanga aibelena jembi liasü.

Lachit Borphukanm ya taoba Ahom chuba yimli nung putu 17 buba general ka liasü aser pa ya India nüjiso atema rara nung shilem kecha mali.

India nüjiso rara metenzükdang küm noklang ana tejakdang Ahom general ya April 25, 1672 nü asü. India nüjiso atema rara ya 1857 nungi 1947 tashi liasü.

PM Modi-i Lachit Borphukan indang onük jembiba ajanga pai Assam aser Northeast indang otsü junga memetetba sayur ta pai aitsürtemi ashir.



Guwahati nung Assam Nationalist Congress Party (NCP) President Dhiren Dev Adhikari-i anir party lennirtemi state assembly election atema manifesto sayadang agiba noksa angur. (Guwahati, March 13)

LIRMEN SENSO ASENTENSHI SENTONG



Anogo: 26th - 28th March 2021

Omen: "Chichiba Asentenshi"

Tetongzüker : Humane Touch

O JEMBIRTEM

1. Lirmen Baptist Arogo
Mr. Chujang Aier, President I.E.F
2. Tsuremmen Baptist Arogo
Mrs. Temsula Lemtur, Dimapur
3. Akumen Baptist Arogo
Mr. Akumernba Imsong, Mokokchung

METETDAKTSÜR

1. Lirmen senso bendanglen alir ajak Lirmen, Tsuremmen aser Akumen, koba Arogo nung tennür, idakji arua atentsü pelashishia jaoker.
2. 27th March 2021 (honibar) anepdang 6:00 -9:00 AM lumia sarasademba mapang alitsü. Sensosanger kar iba sentong nung metentetsüsa kümra pei alidak kesa mapang nung lumia sarasademtsü ayongzüker.
3. Iba sentong takok aser temoatsü asoshi ajaki sarasadema atadi.

Sd/- Rev. A. Mar Pastor Lirmen Baptist Arogo	Sd/- B. Atuba Imchen Pastor Tsurremmen Baptist Arogo	Sd/- Anok Walling Pastor Akumen Baptist Arogo
--	--	---

Manipur nung bomb ka angu

Imphal, March 13 (Agencies): Manipur kübok Imphal East district nung Assam Rifles (AR) indang transit camp ka anasa bomb ka ngutet.

Manipur Police-i bomb ji timtem melii bener oa raksa endokogo. Iba mapa ya People's Revolutionary Party of Kangleipak (PREPAK) Progressive Group ajanga inyak asütsü akok ta police-i temolung melemer.

Anogo ishika tejaklen iba transit camp anasa bomb ka raksa endoktsü merangdang AR jawan ka yirua liasü. Iba mapangji PREPAK (Progressive)-i tenüng agiba metetdaksüogo.

Taoba Mongulbarnü telungpur telok balala nungi nisung 20-i Chief Minister N Biren Singh tsüngdang temai adokba atema PREPAK (Progressive)-i jashir.

Margherita nung BJP lennir ka tepsetba atema nisung ka apu

Guwahati, March 13 (Agencies): Tinsukia kübok Buridihing Gaong Panchayat nung Bharatiya Janata Party (BJP) booth president tepsetba dak sendakba nung Assam police-i nisung ka puogo.

Iba kasa yimtsüng nungi Joy Chandra Gogoi (46) ta ser nisung ka puogo. Onoki nisung tepsetba kotari angutsü atema bushisüngdangdar, ta Police-i

ashi. BJP lennir Devananda Gogoi ji par kidang atsü mapa inyaka lia tepset. Pa idangji mozü kidangi anir ao saka mekümzüktet.

Chief minister Sarbananda Sonowal aser Himanta Biswa Sarma nati anir nisung aikati pa asüba atema mangyimba metetdaksüogo aser pa den par kibong asoshi temeten bushitsü nangzükogo.

Arunachal sorkari 'Airgun Surrender Abhiyan' tenzüktsü

Itanagar, March 13 (Agencies): Pasighat nung All Bogong Students' Union (ABSU)-i Arunachal Pradesh nung Environment & Forest Minister Mama Natung den ajurutepa 'Airgun Surrender Abhiyan' pusema nungitba metetdaksüogo.

ABSU-i iba maparen pusema nungitba kuli sayua Minister Natung nem shidi ka agütsü.

"ABSU-i Pasighat aser Bogong Banggo yimtsüngtem nung alir ajak tenüng nung Airgun surrender Abhiyan tenzükba atema pelaba metetdaksü. Iba maparen ya forest department-i April 1 nungi state ajungalen tenzüktsü"

ta shidi nung shia lir.

"Asen nisungtemi mashimashi khasetba agi senti ozü aser shiruru aika samaogo aser kar tesamar dang lir" ta ABSU-isa metetdaksü.

"Onoki sorkar den iba Abhiyan nung yariteptsü renema lir. Onokisa Minister dang Deputy Commissioner, East Siang dang district ajunga nung Airgun Surrender Abhiyan mapa inyaktsü tetuyuba agütsütsü ayongzüker" ta parnokisa ashi.

D Ering Wildlife Sanctuary Divisional Forest Officer Tasang Taga-i ashiba agi airguns noktangba ajanga arem shiruru wazüka ayuba nung teyari tulu angutsü.



TIR YIMYIM YIMOBILEM (EDITORIAL)

DIMAPUR AMUNGNÜ, METSÜREMI (MARCH) 14, 2021

Tsüngremi junger ta ashiba taküm

Asenok shiba südirsüaka, asen taküm nung tajunga lir aser tamajunga lir. Iba amaji asen junger ta ashirtema aika lir aser majunga ta ashirtema aika lir. Ibayongji, aiben asenoki asenoksasa aseni shitak asü tai inyaker ta masü saka tangari kechi ashir ta asüba tsütsü temulung tagütsüba agüja inyaker aser bilemer. Iba jagi tangari asen junger ta ashidang pelar saka ano majunga ta ashidang jashir ta asen taküm nung asen kibur masü saka tangarang kibur kümdaktsür. Atangji, asen libaliro aser asenoki inyakba mapatem ajak nung tangari junger ta ashitsüsa asen taküm ya ajak asoshi tatishitsü tajung küma alitsüla. Aji tongtibang. Ajisüaka, iba dang nung jagi tongtibangtibaji asen taküm jakla yimya aser inyaksangshi mapatem indang Tsüngremia kechi ashir (?) ta asübaji asütsü. Tenyar Paul-i pa shiditem ajanga asenok nem angatetdaksünübajia, pai osangtajung sangdonga jajaba aser tamanger züindaktsüba mapatemji nisung nungi tenüngsang angutsü asoshi masü saka Tsüngrem sentsüwangshidaktsütsü asoshi inyaker ta angatetdaksünüa zülü. Aji oda, kodang asenoki Paul-i Korint nungertem dangi züluba shidi züngdangdir, 2 Korint 10:18 nung, " shibai peisasa junger ta sangdir pa tetemsü masü, saka Tsüngremi shiba dang junger ta sangdir pajiang tetemsü," ta tanüang asenok dangi zülur amai shia angur. Paul mapang nunga nisung aika pa ajanga temulung meyip saka ano aikati Paul-i shidibo kanga sashia zülur saka pai shidi nung züluba ama pa temang tashi itta malir aser o shitak mejembir ta aija jembiba kuli asenoki 2 Korint 10:10 nung angur. Iba amaji nisungtemi pa majung jembiba angashir, pai Korint nungertem dang nisungtemi Paul junger majunga ta jembibaji masü saka Tsüngremi Paul taküm aser pa mapaji koma agir ta asübaji dang agitsü ta angatetdaksünüa züluba shidiji ibai liasü. Asenok Khristan taküm asoshi asenoki inyakba nung tangari junger ta südaktsütsü asoshi inyakba o Tsüngremi junger ta südaktsütsü asoshi inyakba yimya aser tajangzük balala lir. Iba jagi Mathi 6 nung, nai kodang angati ajungba mapa tajung inyakdir, nisung ajak nem ngudakja aser angashidakja inyaktsü temerang saka nai nü teka tajiji agi kechi inyaker aji nü teka abelen nema temetetdaksü ta Yisui asenok dang ashiba angur. Kodang asenoki yimjak nung ajaki ngua Tsüngrem masü saka nisung peladaktsütsü aser nisungtem nungi tenüngsang angutsü atema inyaker, atangji, nisungtemi junger ta tenüngsang agütsübaji dang asenok tajangzük asütsü ta iba Lai tekong yagi asenok nem angatetdaksüner. Ajisüaka, kodang asenoki mapa tajung ka nisung nungi masü saka Tsüngrem nungi tenüngsang angutsü imlaa miima inyaker, asenok atema tajangzükji Tsüngremi asenok otia moatsütsü ta kasa Mathi tapu 6:4 nung angur. Tsüngremi nisung ajaki angutsüsa aser metettsüsa otia moatsüba tajangzükjia koda tulu asütsü ! Nisung peladaktsütsü inyakba o Tsüngrem peladaktsütsü inyakba tetsüngda anaji aji lir. Atangji, nisung pelatsüsa inyakbaji Tsüngrem peladaktsütsü inyakba mapatem asütsüa akok. Ajisüaka, asenoki kechi koma yimya ka nung kechi bilemer inyaker ta asübajiang Tsüngremibo agitsü, kechiyong Tsüngremibo asen mulungjang dang repranger. Asenokia asen taküm nung shiba peladaktsütsü meranger ? Shirnok nem asenoki inyakba mapatem junger ta shidaksüner ? Mesüra shibai aser shirnoki junger ta ashiba mapatem dang inyaker ? Nisungtemi asen mapa nung junger ta ashidang asenok pelar saka iba tepelajibo kodang ano parnoki majunga ta shidir idangjisa samatsü. Ajisüaka, kodang asenoki inyakba mapa nung Tsüngrem peladir, iba tepelajibo nisungtemi asen majung jembiba aser arishiba agi mesamatsütettsü. Iba tepelaji miimshia meyutettsü, kechiyong iba tepelajibo Tsüngremi asenok otia moatsüba tajangzük aser temoatsü lir.

OLEMSABANG

TEMO AKETBA NORTHEAST INDIA ALIMA WARA SÜLEN ALA-ASHI KOKTETTSÜYIM

S. Temjen Imchen

Okila

Temalen agüja aliba onükji kanga tesadem aser asen tensa nung kanga tapet lir. Anungji, asen atepzüng nung dang masü, saka Northeast India (NEI) aser alima ajonga kangshidaktsüba tesashi-wara koma angateta, khuret ka ama masü saka senti mapang ka amaiang agizüka, iba tangatetba nung libaliroa aotsü tebilemba iba onük ya lemsateper.

Northeast India-ji temo aketba linük asü?

Northeast India linük ya yimya dak aketba kanga tobur tajung tenemtem, ayi-limatem, tzülok ayimba, temerük ayongtem, wapetsa aliba jaka aika, arem shiruru aser süngdonglidong tapu aika aliba tesem ka lir. Item alima temang dak aketba tetsüng teben jagi alimaji temo aketba lima ka ta sayur. Saka, iba tereprangnüsü noksaji maka-mait (poverty), senso ka sen ishishi dang anguba, mapa mangubapur jenti, aser alu nung kanga dang ajemshia züsentetba - koba ajanga chiyungtsü peria kümzüka meyutetba lima ka (Cf. *The Policy Brief 25 of ICAR, Dec. 2006*). Terajemba nung lemsateptsü mechi, asenoki lenmang anasü nungi ajidangtsü akok – agüja aliba alijak tereprangtsü aser iba lu nung mongyintemi kechi ashir iba telangzüba indang kar sayur.

a. Temo aketba Northeast indang temetettsü:

Loktiliba aser rongsen asadangba ajak nung litsüküm (landmass) aser nütsüng yongsük metetbaji mezüng shilem lir. Northeast India nung state ti (8) – Arunachal Pradesh, Assam, Meghalaya, Manipur, Mizoram, Nagaland, Tripura aser Sikkim – jagi 255.79 lakh hectares, iba nung India rangpen ajunga nung ali tasazük 7.92% agi NEI region ya küma lir. Iba tesem ya tekong-tenem aika ajashia-a oa akümba angur (diverse ecosystem). Tekong-tenem jagi 2/3% ka agi akhümpanga tenteta aliba ngur. Aluyimbaji rongsen ketdangtsüba nung tongtibang shilem ka. Iba sülen shiruru metsüba arur. Iba tesem ya India lima nütsüng yongsük ajonga nung 3.75% shi lir aser NEI nungi 2.6 % Net Domestic Product linük nem agütsür. Iba telungtet jaka nung arem-min tasazük 66.1% jika adoker. India linük denji medemdangra, ibaji 21.1% asateter (see the report *Untapped Potential of Northeast Region of India*, p.2.). Iba litsüküm aser lipuküm (ecosystem) nung ajemdaker, yimya-yimko atonger rogo telok ishikati ali temo indang tajitetba agütsüba teküboklen angutsü. Ibaji asenoki ajidangdi.

b. NEI tesem nung Terenlok asadangba Mongyintem Teloki bushitetba:

Tamalen tasüngdangba – *Northeast Indiaji temo aketba linük asü?* – nung ajemdaker, India linük nung tebilemdang-akaba telok (think-tank group) ishikati iba yimsü indang junga bushi aser parnoki bushiba nungi kechi ngutet ibaji osang agütsü. Item mongyintem telokji yamai: *Development of Northeast Region* (DONER), *North-East Council* (NEC), aser pan-India policy-makers koba nung *Indian Council of Food and Agriculture* (ICFA), *Federation of Indian Chambers of Commerce and Industry* (FICCI), item telok ajanga mapaji inyaker. Tasüngdangba nung telangzübaji the Indian Council of Food and Agriculture teloki yamai agütsü, NEI ya “**munguteti akaba tashi**” (“untapped potential”) lir ta sangoktsü (tazüngtsü report, *Untapped Potential of Northeast Region of India*, ICFA's report of the National Round Table Conference, New Delhi, March 15, 2017). Iba ‘munguteti-aliba tashi’ ya lokti rongsen terenlok bushiba nung kanga tongtibang ta angtetdi.

Iba dak alaka ano tanga tasadanger telok tenüng ka agi – FICCI-PMPG – teloki ashiba agi, NEI “tesemji ali temo aser tzüpokdak agi süphanga lir, koba nung süngjanglijang lu yanglutet, aser ano terenlokba nung aotsü mechi nung item takang sobalibaren aser yimyaliro bushitettsü koka lir” (the stretch boasts of **fertile land** and water resources, an ideal habitat for horticulture, and a rich cultural and natural heritage that could be explored further for development (PMPG-FICCI's report, *Emerging North-East India*, 2015, p.6). Item tebushitetba ya asen linük aser alima rangpen ajonga nungi tebilemdang akaba mongyin telok balalai ashiba angashidang asenok asoshi tajung aser temulung adangtsü otem lir.

Saka, tebilemdangtsü tulu ka lir! NEI ya yimya-lemang aisü nung takatit asüyonga, nüburtem aika India yimtem aser jila balalai tanga limai oa alitsü (migration) yimya aser tatalokba ka ngua arur. Karbo anosa aor! Tanga limai oa alitsü yimya-yimpong nungji leman aisü lir – kar tazüngi aor, kar mapa bushia aor, kar shishilembai aor, kar hachira/ayangi aor, ano yamala yimyaji alitsü akok. Item telok taodakji sorkar kübok, private mesüra corporate tentet asütsü akok.

Tebilemstü kaji ya - tanga limai oa alitsü yimya-yimpong nungji mapa inyaki aoba tiemba asür. Ya kechiba ta asüngdangdang, NEI nung maka-mait aliba ajanga iba timtem adoker ta shiteter. Süra, iba loktiliba aser rongsen yimya-yimpong dak aketba indang ya tatsü agi shisadangdi.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Chhattisgarh state nung lokti kati Khristantem dak azük



2020 küm October ita nung Chhattisgarh district kübok Kondagaon district nung Hindu nungertemi tribal Khristantem dak azükba sülen Khristantemi sorkar ketdangser ka dang parnok area nung Khristantem anema inyakba osang metetdaksüba noksa nung angur.

March 13, 2021: March 8, 2021 nü Chhattisgarh state kübok Bastar district nung Khristantem tekülem sentong tagidak mapang nung lokti kati süng-long bener arua Khristantem dak azük; iba tatalokba nung Khristan ti yirua hospital-i anir ao.

March 8, 2021 aonung 7:00 ako meta ki ka nung Khristan 150 shi adenshir tekülem sentong agiba mapang nung

nisung ka tenüng agi Ando Guddi leniba nung tebur 30 shia arua Khristantem dak azük.

Khristantemi ozüing alema Hindu nungertem tamangba yimsü meyipdaksür, ta Khristantem nem tai tonglokja parnoki süng-long amshia Khristantem dak azük. Parnokisa Khristantem indang motorbike ka den cycle aika rongdoksü.

International Christian

Concern (ICC) den jembidang Khristan kati, "Tamangba yimsü nung ajemdaker nübur tsüingda telemsa adokdaksütsü atema yangi aliba yimten lenir kari meranger. Yangi Khristantem anema inyakba ya tang mezüing ataloker masü. Khristantem aser pastor tem anema inyakba tatalokba aika lir. Item ama tatalokba kanga buluaka police-i onok kangabo meyarir," ta metetdaksü.

Tawa tatalokba ken o police nem agütsü saka Police-i First Information Report (FIR) magizük.

Iba tatalokba nung pastor, Samson Bhagel densema Khristan ti yiru. Bastor district nung Samson-i tesüiba küm 11 tashi tamanger lokti 13 ketdangsüa repranger.

Pastor kinüngtsü, Durasth Bhagel-i, "Kü kinüngbu aser Khristantem dak atalokba ya kanga majung. Onoki tang ama tensa ya kodanga majurudang," ta ashi.

Tenla kidangi aoer shilem 91-i wara sülen Tenla kidangi aotsü melunger

March 13, 2021: Tenla kidangi oa tekülem sentong nung adener Protestant Khristantem shilem 91-i coronavirus wara anenba sülen tekülem kidangi aotsü melunga lir, ta Lifeway Research survey tasen ka ajanga bushitett.

Tenla kidangi aoer timbakati coronavirus wara mapang nung parnoki Tsüngrem den tesendaktep tajungba yangluogo, ta ashi.

Iba survey nung America nunger Protestant Khristan 1000-i shilem agia liasü. Survey nung shilem agi shilem 68-i, coronavirus wara marudang parnoki Tenla kidangi koma oa liasü, yamaji kasa aotsü ta ashi aser shilem 23-ibo, parnoki tamalen dang nungi tang temerangba Tenla kidangi aotsü, ta langzüa liasü.

Khristan shilem 91-i parnoki akhi ama mesüra temerangba Tenla kidangi aotsü ta ashi; shilem 6-i dang parnoki Tenla kidangi taoba mapang dang nungi tang tajemba aotsü, ta ashi.

Lifeway Research executive director, Scott McConnell-i, iba survey ajanga bushitetba osang ya pastor tem aser Arogotem atema osang tajung ka lir, kechiyong January ita tashi nung Tenla kidangi arurtem ishika dang liasü, ta metetdaksü.

McConnell-i, "January ita nung Tenla kitem lapokba Arogotem nung pastor shilem asemsü nungi shilem anatibo, January ita nung Tenla kidangi arurtem shilem 70 dang nungi tajemba liasü ta shiogo. Pastor aikati pei santem tanaben Tenla kidangi arutsü asü marutsü ta

shisabulur. Ajisüaka Tenla kidangi aoer nisung 10 shia nungi nisung 9-ibosa wara süiba sülen Tenla kidangi aotsü ta jangjaogo," ta metetdaksü.

Iba survey nung shilem agir shilem 54-i, coronavirus wara mapang nung Tsüngrem den tesendaktep tajungba kümogo ta ashi aser shilem 27 dak temai Tsüngrem den tesendaktep kanga agia tajungba kümogo, ta ashi.

Wara mapang nung shilem 83-i online ajanga yokba tekülem sentongtem nung dena liasü aser shilem 32-i tesüiba küm ka tsüingda online ajanga yokba tekülem sentong tajemba agia 18 nungbosa denogo, ta survey ajanga bushitet.

Iba survey poll ya taküm February 5 nungi February 18 tashi agia liasü.

Laishir aser scientist John Polkinghorne süogo

March 13, 2021: Nüngtugu Laishir, Khristan scientist aser putir, Rev. Canon Dr John Polkinghorne alima nungi pilaogo; pa Anglican putir ka liasü.

Polkinghorne-i mapang ajak nung tamangba yimsü aser science na tesendaktep medemdanga jembia aruogo; pa ya quantum physics nung kanga mongin ka liasü aser taküm nung kanga tongtimbang tasüngdangbatem shisadangtsü atema science amshiba asoshi pa nem Templeton Award agüja liasü.

Queens' College Cambridge-i pa alima nungi pilaba osang sangdong. Iba college nung pa 1989 nungi 1996 küm tashi President inyakba liasü aser tesülen Honorary Fellow shim.

1968 küm nungi pa University of Cambridge nung



Mathematical Physics professor inyak aser 1979 küm anisüngzükbä sülen putir ka kuma 1982 küm nungi Church of England nung Ordained süa liasü.

Science, tamanga yimsü, shisaliok aser medical tsütsü pai nübur tenzükbä mapa tajung aika inyakba atema 1997 küm pa nem 'Knighthood' agütsü.

Pa Bristol nung curate inyak, iba sülen Kent nung vicar inyak. 1986 küm pa tanaben Cambridge-i oa Trinity Hall &

President of Queens' College nung Dean inyakba liasü.

Tang Queens' College nung President teinyakdak, Dr Mohamed El-Erian-i, "John-i pa taküm kanga junga litetogo. Pa 1930 küm aso aser pai physician ka ama, Laishir ka ama aser putir ka ama nisung aika taküm nung temelenshi bener arutsüogo. Pai kaket aika zülü aser pai tamangba yimsü aser science na medemdanga tongtimbang research aika agiba agi pa kanga nüngtugu aküm," ta metetdaksü.

Tawa pai mapang shia College semdang aser külem tenzüker aika den tongtepratepa liasü.

Tang coronavirus wara aliba agi pa den asüpila sentong nung par kinüngertem ang aden, ajisüaka wara anenba sülen pa nüngtem nung memorial service ka ayongzüka agitsü.

ANO GO ABEN TSÜNGREM DEN

Chichiba tenlaba yimya


"Kechi bener ni Kibuba madangi arutsü, aser kü sasa temaba Tsüngrem madang apudaksü? Ni tarongba tenla den küm ka nashi chanu bener arutsü asü?" (Mika 6:6)

Asenok tangatetba kaji Kibuba matsüngdang tenlaba mapaji rongsen tenla, ter shilem tenla, temoatsü tenlatem, aser mezüing züsentetba tenlatem tenla kidangi bener aruba ya dang amai bilemadoker. Item tenlatem yabo sentepi arur marur ajaki kanga meranga tenla-a arudar. Kibubai pela-a alitsü ta amanger. Saka Kibuba matsüngdang chichiba tenlaji pei taküm tenlaba ya lir. (Rom 12:1). Tejen Lai mapang talisa Livi kaket nung tenlaba tapu balala shia angutsü. Saka Mika ainkar-i ashir itemji teperi masü. San tebong meyisa meyi mesüra toztü ayongtem meyi agi kibuba peladaksütsü makok (Mika 6:7) ta ashir. Saka Kibuba matsüngdang chichiba tenlaji ochishia inyaktsü, yimlibilema meimtsü, aser Tsüngrem den ajemalua jajatsü (Mika 6:8). Yamaji Yisu Khristai pa taküm agi koda tenlatsü aji sayu. Ne taküm tenla khen shisadangang nai ochishia lidar ma? Tangari na anema benshiaka, nai yimlibilem sayudar ma? Aser ajemaluba tanela agi na anishidaksür ama? Yisui nai tenladak kwi inoktsü aji masü, saka ne takümi koma tenlar aji repranger.

Sarasadem

Kibuba kü teka nung kechi ama lir aji masü, saka kü mulungjang nung kechi tenla lir aji nai akhanger. Kü taküm yimya agi ne dang tenlatsü ni angazüker. Amen

India linük nung Khristantem anema inyakba kaket ka sayaogo



March 13, 2021: Butler University nung professor, Chad Bauman-i India nung Khristantem anema inyakba kaket ka zülua sayaogo.

Pai züluba kaket 'Anti-Christian Violence in India (Religion and Conflict)' nungji Hindu nunger nütsüing timba aliba linük (India) nung akhidang Khristantem aser Hindu nunger na tsüingda tesendaktep koma liasü, iba indangji shia lir, iba denji külemi tang India nung Khristantem anema inyakba tatalokbatem kanga bulua akümba indang shia lir.

Akhidangbo India nung Khristantem anema inyakba tatalokba kar dang liasü saka tesüiba küm ishika tsüingda Khristantem anema inyakba kanga bulua akümba indang pai shia lir.

2014 küm Narendra Modi leniba nung BJP-i takok ngua Centre nung sorkar akümba sülen linük nung Khristantem

anema inyakba kanga bulua kümogo, ta watchdog organizations aikati metetdaksüogo.

Modi aser BJP-i Khristantem aser Muslim nungertem sempaba ajanga linük nung reshikangshi kanga bulua akümer aser state aika nung anti-conversion ozüingtem agizüker, ta watchdog organizations-i metetdaksü.

India linük nung religious freedom jenjang tamajungba akümba atema jembiba mapang ka nung

Professor Bauman-i züluba kaket sayar.

India nung religious freedom jenjang tamajungba akümba ajanga United States Commission on International Religious Freedom (USCIRF)-i 2020 küm US Department of State dang India linük ya Country of Particular Concern (CPC) nung züngoktsü mepishia liasü, ajisüaka Trump Administration-i magizük.

India nung yimtenren lenirtem aikati Muslim aser Khristantem ya (minorities) bendangertem ama züngshir. Hindutva teloktemi India ya Hindu linük ka kümdaksütsü nükjiding yur inyaker.

India linük temzüing nung senso ajak nem 'religious freedom' temeden agütsür saka tamangba yimsü meyipba nokdangtsü aser Khristan den Muslim nunger anema inyaktsü atema state aika nung anti-conversion ozüingtem agizükogo.

* Lai meranga inyakba **agi** takok angu.

Tir Yimyim

1	Hero Electric	2,201
2	Okinawa	1,059
3	Ampere	800
4	Ather Energy	624
5	PureEV	404
6	Benling	254
7	TVS	208
8	Jitendra New EV	124
9	Bajaj	111
10	MEW Electricals	80
11	Revolt	70
12	Goreen E-mobility	45
13	Ira Edutech	11
14	M2GO Electric	6
15	NDS Eco Motors	5
16	Odyse Electric	5
17	Supereco Auto	4
18	Avan Motors	3
19	SBTEK E Moto	2
20	Others	43

1. Peria - (5)
2. Tai inyak - (7)
4. Teptsü - (4)
5. Kotak _ _ _ _ _ - (6)
6. Asa _ _ _ ang - (3)
8. Taruba küm - (7)
9. Tamendak - (6)
11. Kibong yongsük - (5)
12. Kümtetta ao - (4)
13. Mesük - (3)

1. Yongya, 2. Moko, 3. Marok,
5. Teronem, 6. Nung, 8. Amajok,
9. Jangzü, 10. belem, 12. Rong.


3	2					4			3	9	5	2	1	7	4	6	8
1			5						7	6	4	3	8	9	1	5	2
	6			1			8	2	2	8	1	4	5	6	9	7	3
		5	7						4	7	9	5	6	2	8	3	1
		1	2	6					5	2	8	9	3	1	6	4	7
						3			1	3	6	8	7	4	2	9	5
		8					6		8	5	2	6	4	3	7	1	9
2			4	5			1	8	6	1	3	7	9	8	5	2	4
9		6	3		2				9	4	7	1	2	5	3	8	6

[illegible]

TEBANG AGI DANG ABENSAA JEMBITETBA JAGI
MAPA KODANGA NUNGER MAOTSÜ

Q. Municipal aser Town Council nung tetsürtem asoshi menden 33% shiteta yutsütsü melena political party shiai 33 % tetsür candidate shim nunga koma süla ?

Olong 20 shi nung March 19, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.



TANÜBO NAI LANGZÜANG

A. 2015 B. 2016 C. 2017 D. 2018

===== (Taruba adok nung onoki langzүtsү)

YASHI ADOK TELANGZÜBA : Singapore



March 13, 2021 nü Parliament Annexe, New Delhi nung Rajya Sabha nung tang züngsem tasenpurtem atema orientation programme agidang tangokba noksa nung angur.

Bangladesh nunger Hon Jubilee atema Ato kilonser, Modi jaok

New Delhi/Dhaka, March 13 (Agencies): Bangladesh linük tebuti, Bangabandhu Sheikh Mujibur Rahman sor küm 100 ajungba aser linük nüchiso ngur küm 50 ajungba Jubilee mong nung adentsü atema India Ato kilonser, Narendra Modi densema alima nung lenir aika jaoka lir.

Bangladesh nunger Hon Jubilee mongji March 17 nungi March 27 tashi amongtsü aser item sentong nung adentsü atema Maldives Tir, Ibrahim Mohamed Solih, Nepal Tir, Bidya Devi Bhandari aser Sri Lanka Ato kilonser, Mahinda Rajapaksa nungera jaoka lir.

Modi, Solih aser Rajapaksa nungeri Bangladesh Ato kilonser, Sheikh Hasina aser Bhandari na ajurutsü aser

Bangladesh Tir, Md Abdul Hamid-i parnok den senden amentsü.

Item sentong agitsü atema Bangladesh sorkari linük yimtiba, Dhaka nung aliba National Parade Square nung kanga mazüngi renemshidar.

National Parade Ground nung lenir pezüpronglai o jembitsü aser item sentongji live yoktsü.

Honibarnü India nunger osangbener ka den jembidang Bangladesh Home Minister, Asaduzzaman Kamal Khan-i, tang coronavirus wara aliba nung ajemdaker lokti tulu madenshitsü aser security peria agütsütsü, ta metetdaksü.

Item sentong nung jaoka alir lenirtem dak jelia Covid-19 tendangsü aser negative report

bener ang sentongtem nung adentsü, ta paisa metetdaksü.

National Parade Ground nung agiba sentong shia nung bendanger aser sensotem ajak senteper nisung 500 tashi dang adentsü aser tejaokertem anogo pezünü tashi sentong balala nung adentsü.

Maldives Tir, Solih March 17-18 anogotem nung adentsü, Sri Lanka lenir Rajapaksa March 19-20 anogotem nung adentsü, Nepal lenir, Bhandari March 22-23 anogotem nung adentsü aser India Ato kilonser Modi March 26-27 anogotem nung adentsü.

Iba dak alia US, Canada, China aser France densema linük balala nungi lenirtemi Bangladesh den video ajanga salem osang lemsateptsü.

Taoba mapang BJP lenir tain, Yashwant Sinha-i TMC nung aden

New Delhi, March 13 (Agencies): Honibarnü taoba mapang BJP lenir aser taoba mapang Union Minister, Yashwant Sinha-i Mamata Banerjee-i aniba party TMC nung denogo.

Kolkata nung aliba Trinamool Bhawan nung TMC lenirtem- Derek O'Brien, Sudip Bandopadhyay aser Subrata Mukherjee nunger matsüngdang Sinha-i TMC party nung aden.

TMC nung adenba sülen arrshi küm 83, Yashwant Sinha-i, "Ni kanga tambur süaka ni yimtenren nungi pilaba ajanga

nenok süngmangtsü. Süra tang kechiba ni party ka nung dena yimtenren nung ajemoker ta nenoki bilema alitsü? Tang linüki tensa balaka ajangshiba agi ni yimtenren nung ajemoker," ta metetdaksü.

"Tang linük nung tensa balaka ajangshidar. Democracy tashiji democracy indang rejutem nung keta lir. Judiciary densema reju ajak tashi meiti kümдар," ta pai ashi.

Osangbenertem den jembidang pai tang Delhi arrtsülen aluyimertemi longkak aitba aser China den tensa mejungi aliba densema onük

aika nung pa tebilemba lemsatepa liasü.

Sinha-isa osangbenertem dang, tang Narendra Modi-i aniba sorkar aser taoba mapang BJP lenir, AB Vajpayee-i aniba sorkar na medemdangtsüla, ta ayongzü.

"Atal yimsüsüba mapang nung BJP-i lenir ajak züngoka liasü saka tanübo sorkari ola nembangtsür. Akali aser BJD-i BJP teloktep toktsüogo. Tanübo shirnok BJP den nokdaka lir?" ta pai asüngdang.

"Sorkari aibelenba nokdangtsüsa shinga mali.

(Maneni tapak 9 nung...)



March 13, 2021 nü Patna nung Bihar Assembly nung budget senden tagidak mapang assembly kima Rashtriya Janata Dal (RJD) MLA temi state nung yi nokdangba ozüng anema longkak aitba noksa nung angur.

Covid mapang India-i linük 150 nem teyari agütsüogo: Piyush Goyal

Tirupati, March 13 (Agencies): Coronavirus wara mapang nung Ato kilonser, Narendra Modi lenisüba kübok India-i linük 150 nem teyari agütsüogo, ta Honibarnü Railway Minister, Piyush Goyal-i metetdaksü.

Tirumala nung Venkateswara tsüngrem tekülem kidang sarasademba sülen osangbenertem den jembidang Piyush Goyal-i, wara mapang nung nütsüng crore 130 dak tema aliba linüki (India) iba wara anema junga raraba alimai metetogo, ta ashi.

Wara mapang nung India-i shinga dak-a memetalok saka wara anema raratsü atema alima nem teyari agütsü, ta Minister-i metetdaksü.

Ato kilonseri 'Vasudhaiva Kutumbakam' (alima ya kibong ka dang) tangatetba nung linük 150 nem Covid-19 mozütem supply agütsü, ta pai ashi.

"India nungeri pei sasa

kümzüksü merangba dang masü saka alima atema-a bilemja inyakba ajanga India nunger chichiba tashi aser tanela sayur," ta pai ashi.

Covid-19 wara ya ano metembang, ta shia pai nüburtem dang maneni kanga kümdanga alitsüla aser nisung o nisung tsüngda tepila aliba den külemi mask agiba densema wara anema telatetba ajak benshitsü mepishi.

"Linük nung nisung ajak coronavirus vaccine magi tashi aser taneptsü mangu tashi asenoki maneni kümdanga alitsüla," ta pai ashi.

Covid-19 tenokdangbatem aika agienba sülen India nunger rongsenkettsüng ain tenzükogo aser yaküm küm den medemdangra Indian railway-i khu abenba train timba senzüogo aser mail train densema passenger train shilem 80 jungnüa senzüdar, ta paisa metetdaksü.

Tamil Nadu assembly election atema DMK-i party manifesto saya



March 13, 2021 nü Chennai nung Dravida Munnetra Kazhagam (DMK) Tir, MK Stalin, party General Secretary Durai Murugan (abelen) aser party Treasurer, T.R. Baalu (ajichilen) nungeri Tamil Nadu Assembly election atema party manifesto sayadang tangokba noksa nung angur.

Chennai, Metsüremi/March 13 (Agencies): Tamil Nadu nung assembly elections agitsü mapang ana nung lia Honibarnü DMK-i party manifesto ajanga gari totzü aser mamatzü jenjang ajemtsütsü, LPG atema subsidy agütsütsü aser state nung Tamil nunger atema mapa shilem 75 wazüka yutsütsü nangzükogo.

DMK Tir, M.K Stalin-i tenangzüka 500 aliba manifesto nungi tenangzüka 50 metetdaksüdang pai, election nung takok ngura party-i petrol litre shia sen 5 aser diesel litre shia sen 4 ajemtsü, LPG cylinder shia subsidy sen 100 agütsütsü aser Aavin company-i agütsüba mamatzü litre shia sen 3 ajemer agütsütsü, ta metetdaksü.

Kibong shia tetsütem nem ita shia sen meyirjang kaka (1000) agütsütsü aser city bus nung angati senzüdaksütsü; sorkar school tem nung azünger kaketshirtem nem mamatzü angati agütsütsü aser college shisaliok atema agiba loan sentsüh atoktsü; ration card alir ajak nem Covid-19 allowance sen 4,000 agütsütsü aser tang


wara nung ajemdaker kiojen tax matutsü, ta party manifesto nung nangzüka lir.

DMK-isa mapa lakh 2 adokdaksütsü aser sorkar department balala nung mapa tazüng aliba ajak nung nisung shimoktsü, ta nangzü. Party-i state nung mapa shilem 75 bo Tamil nunger nem agütsütsü aser nija sector nunga Tamil nunger nem mapa wazüka yutsütsü, ta nangzü.

DMK ya Hindu nunger anemba party ka lir, ta tangari aitsüba nung ajemdaker party-i Kumbabhishekam tekülem ki yanglushitsü atema sen crore 1,000 agütsütsü, tenemlen aliba tekülem kitemi atutsü atema gari service agütsütsü aser linük nung Hindu nunger temeshi aini aotsü atema nisung lakh 1 nem nisung shia sen 25,000 agütsütsü, ta nangzü.

Stalin-i, "DMK-i nangzüka ama shidak inyaktsü aser onoki inyakbaji sangdongtsü. Onoki manifesto nung tenangzüka 500 inyaktsü atema programme implementation ministry ka tentettsü," ta metetdaksü.

Russia nung opposition lenirtem densema nisung 150 apu



Moscow, Metsüremi/March 13 (Agencies): Russia police-i Honibarnü Moscow nung independent aser opposition yimden yimsüsürtem senden ka nungi nisung 150 puogo. Parnok ya sorkari magizükba lokti tentet ka den sendaka aliba atema aitsü, ta monitoring group ka aser TV station kati ashi.

Opposition yimden yimsüsür Alexei Navalny tepuokdaki yokba sülen Kremlin anema nokdakertem puyonga aoba mapang tang item lenirtem ya puogo.

Lokti tentet senden koba Honibar aser Deobarnü agitsü liasü iba senden ya linük ajunga nungi municipal deputies tem senden ka liasü, ta sentong ayonger Open Russia executive director, Andrei Pivovarov-i

ashi. Open Russia ya taoba mapang oil tycoon aser Kremlin aitsür Mikhail Khodorkovsky-i Britian nung amendaker tentetba lokti tentet ka lir, shiba Russia nungi mintoker lir.

Senden tenzükba sülen police tem ki telungi ait aser senden nung dena alirtem putena anir tugua kima anendena aliba police garitem nung anir aoba TV Rain aser Russian news agencies video footage ajanga sayuogo.

OVD-Info, shirnoki yimden yimsüsüba anema longkak aiterter aser activists tem apuba asadanger, parnoki pur aoer nisung 150 dak tema indang list ka sangdongogo.

"Moscow nung municipal deputy tem senden mena aliba tesemi Police tem aru. Iba

senden nung linük ajunga nungi nisung 150 adenshir liasü. Nisung ajak puogo," ta opposition yimden yimsüsür Ilea Yasmin-i tweet asü.

Washington nung amendaker aliba non-profit organization; Free Russia Foundation tatongtir Vladimir Kara-Murza-ia, pa apuba asülen police gari telung nung tangokba noksa ka lemsatet.

Police temi ashiba agi, parnok ya sorkari magizükba lokti tentet ka inyakyim nung shilem agiba atema apu, ta TV Rain-i metetdaksü.

Open Russia ya Moscow-i tenokdangba agütsür aliba lokti tentet 30 rongnung ka lir, koba 2015 küm yangluba ozüing ka ajanga nokdangogo.

Rights advocates temi ashiba agi, "undesirable" organisations aser "foreign agents" dak sendakba nung ozüing yanglur aliba ya civil society zügsemtem nongshitsü aser parnok dak rangloker inyaksü atema amshitetsü. Russia-i iba taitsüba magizüker aser ashiba agi bendangertem inyaksangshi nungi national security kümzüka ayutsü atema ozüingtem nüngdaker.

Sri Lanka nung Burqa nokdangtsü aser Islamic School aika shibangtsütsü

Colombo, Metsüremi/March 13 (Agencies): Sri Lanka nung burqa asemba nokdangtsü aser Islamic schools meyirejang ka dak tema shibangtsütsü, ta minister kati Honibarnü ashi. Iba jenjang agiba ajanga linük nung nütsünyongsük agi ajema aliba Muslim nungertem dak kongshitsü.

Minister for public security Sarath Weerasekera-i osangbenertem den sensaksemba mapang, "national security" dak sendakba nung Muslim tsür kari tejak ajunga sembanger senzüba nokdangtsü atema pai Hokolbarnü cabinet nungi temelaba agitsü asoshi paper ka nung sign süogo, ta ashi.

"Onok mapang nungbo Muslim tetsürtemi kodanga burqa semer mesenzü. Iba ya religious extremism temaitsü ka lir koba tawa poktetogo. Onoki iba ya nokdangtsübasa," ta pai ashi.

Buddhist nunger timba aliba linük nung ya Islamic telungpurtemi tenlaki aser hotel tem poksaja nisung 250 dak

tema tepsetba sülen 2019 küm burqa asemba yimya ya khen atema nokdanga liasü.

Burqa asemtsü nokdangba ajanga Muslim tsürtem Sri Lanka nung nüburtem adenshiba tesem nungi atsingintsü.

Kasa mapang nung Weerasekera-isa, sorkari madrasa Islamic schools meyirejang ka dak tema shibangtsütsü sentong lir, ta ashiba den item school tem yagi national education policy raksatsür, ta ashi.

"Nisung kati school mashi ka lapoka tanurtem dang pei sayunüba mesayutetsü," ta pai ashi.

Muslim nunger tejangraba anema taoba küm COVID-19 tashidak agi asürtem ajak rongtoktsü atema sorkari tuyuba sülen tang burqa asemba nokdangtsü aser school tem shibangtsütsü atema jenjang agidar.

United States aser international rights groups temi aitsüba sülen Burqa asemtsü tenokdangba agütsür aliba ya iba küm tetenzüklen agintsü.

Myanmar nung military anema longkak aiter 4 tepset

Mandalay, Metsüremi/March 13 (Agencies): Myanmar nung security forces temi Honibarnüa taoba ita military-i sorkar atsüngba anema longkak aiterter tashiyim agi aziüktsü merang aser longkak aiter pezü khasetogo.

Linük yimtiba Mandalay nung nisung asem aser Pyay yimti nung nisung ka asüba osang sangdongogo. Nisung pezü asüba aser longkak aiterter yiruba osang ya social media balala nung noksa dena sangdongogo.

Myanmar atema independent UN human rights expert Tom Andrews-i, Brehostibarnü, tang tashi nung Myanmar nung military-i nisung 70 tepsetogo aser military-i Aung San Suu Kyi-i aniba sorkar atsüngtokba sülen meimchir temeden anema inyakba kuli timba timba kümдар, ta ashi.

Social media nungsa Hokolbar aonung Yangon yimti nung nisung asem khasetba sangdongogo. Iba yimti nung nüburtemi joko hopta ishika aonung 8 ako nungi curfew benoka aliba mangai yimtongi adoka longkak aita arudar

Yangon kübok Thaketa jila nung police station ka kima longkak aitba mapang nisung ana tepset. Hokolbar aonung lanur asem pur aoba khanga nüburtemi longkak aita liasü.

Asür ana indang noksa ya online nung prokshia liasü aser kasa mapang nung Hlaing tesem nunga Hokolbarnü aonung arishi küm 19 tain



Yangon, Myanmar kübok Tharkata tesem nung Riot police officer temi longkak aiterter meinshiba mapang longkak aiter ka sota ayuba noksa nung angur. Myanmar atema U.N. special envoy-i, Hokolbarnü Security Council dang jenjang tapet agitsü ayongzüko aser ashiba agi hopta tsüngda yimjung nung longkak aiterter aika sepaitemi tepsetogo aser yirutsüogo.

asangur ka tepseta liasü.

Aonung longkak aitba ya longkak aiterter pisasa kümzüktetsü atema jenjang ka ama angateter koba longkak aiter kari ayongzüka liasü. Police temi nüburtem tsübudaktsütsü atema anüng nung injang khatokba den stun grenades pokdakja aonung kiyong balala maita odor aser iba den kidangi tua nisungtem pur odor. Ken o ana nungbo police temi pur aoer ana tashi pur or ghonda tsüngda asüba lir.

Honibarnüsa Mandalay nungi Kachin state yimtiba Myitkyina-i aoba railway

lenmang nung apu ka raksar aliba noksa online nung prokshiogo, koba linük ajunga nung state railway workers tem

longkak aitba pusemtsü atema asütsü akok mesera Kachi-i sepai tali yoktsü tashi tajemba kümduktetsü atema asütsü akok. Ajisüaka iba lenmang raksatsüba indang shingaia nangzüka mali

Kachi state aser centre sorkar na mapang talangka mangatetep adoka arudar aser iba state nung telungpur telok ana lir aser Myitkyina nung security forces' temi longkak aiter ana tepsetba osang angazüka iba tesem nung alirtem kanga meita adoka liasü.

Sorkar anema tashiyim amshia nokdaktsü atema longkak aiterter kari yimjak nung jembia aruogo aser parnoki China-i yokba natural

gas pipeline ka poksatsütsü amokmerenogo. Parnoki China ya junta pusemer tongtiba ama bilemer.

Kasa mapang nung Washington nung Hokolbarnü Biden administration-i Myanmar nungi nüburtem nem khen atema ozüing kübok talidak agütsütsü telemetba agiba sangdongogo.

Homeland Security Secretary Alejandro Mayorkas-i ashiba agi, Myanmar nunger nem ita 18 atema tekümzüka agütsütsü. Iba maongka ya United States nung tang tilidak pur atema lir. Mayorkas-i ashiba agi, Myanmar nung tensa tamajungba küma odor anungji nüburtem kidangi meyipa aotsü

tasak asütsü.

Maneni Myanmar police aika parnok kibong den India-i jena aruogo, ta security ketdangsertemi Hokolbarnü ashi. Officer kati AFP dang ashiba agi Ketdangsertemi longkak aiterter züka rishikangshir.

Military-i tashi yim amshi tenzükba sülen police tem aikati longkak aiterter aziükba sentong nung shilem agitsü nongnanger aser parnok arrtsü nung aliba north-eastern Indian state Mizoram-i jenaogo. Hokolbarnü tashi nung nisung 264 jenaogo, kong police officer 198 aser parnok kingertem densema lir, ta security officials-i ashi.

"Ni military junta kübok minyakner ibayongji ni Myanmar toktsür India-i aru," ta office kai AFP dang ashi.

"Tanabuba kuliji ni military junta toktsür nüburtem den denra military junta anema rara onoki akoktsü ta bilemer," ta pai ashiba den ketdangsertemi parnoki mulungka nung nüburtem züka rishikangshir, ta shisem.

"Ni police temi parnok potentetba tashi nüburtem putener aser item rongnung longkak aiter reprangertem aser noksa agirtem den densema lir," ta pai ashi.

India nung ketdangsertemi arrtsü adena arur nisung tibo meyipa yokogo, ta security source ajangsa metetdaksü. Yimtsüng ka nung tekolak kati iba hopta AFP dang ashiba agi India-i aittsü atema nüburtem aika atatepdar.

Dimapur nung PMFME indang workshop agi

Dimapur, Metsüremi/March 13, 2021 (TYO): Ministry of Food Processing Industries, Government of India kübok ASSOCHAM North Eastern Region Development Council ajanga Department of Industries and Commerce, Government of Nagaland den lungjemer Niathu Resort, Dimapur nung March 12, 2021 nü Pradhan Mantri Formalization of Micro Food Processing Enterprises (PMFME) scheme, Strengthening Micro Food Processing Eco System aser MoFPI Schemes agitsüba indang workshop ka ayongzüka liasü.

Commissioner & Secretary, Department of Industries & Commerce, Kekhrievor Kevichusa-i ashiba agi, iba scheme yagi entrepreneur mapa nung yaritsü aser parnok 'branding', 'marketing', 'packaging' nung nungitba den chiyongsü jenjang (quality) aser

standard tajungba ajungkettsütsü asoshi teyari agütsütsü.

Iba scheme den külemi, Department-i State nung chiyongsütem (süngolemba/süngjanglijang) bendena ayutsü asoshi tesemtem yangluner, ta pai ashi aser Department-i 'food tasting lab' ka amenoktsü asalentong yangludar. Iba food processing lab ajanga shishilembadak entrepreneur tem kanga nungittsü, ta Kevichusa-i shisem.

Director, Industries & Commerce, K Hokishe Assumi-i, iba mapatong nung inyaktertem dang tajungba nung inyaktsü aser iba workshop nung temulung agüja angazüktsü asoshi ajungshiogo.

Director, Frigoscan Food Tech Pvt Ltd, Chennai Shankaran Ramamurthy-i okila jembiba mapang, pai food sector nung 'micro aser small industry' dak sendakba tongtimbang indang nung jembii.

Pai, North East state ajak dang iba scheme agizüktsü asoshi ajungshia liasü, ajiasünungang item tesem (Northeast State) nungi adokba chiyongsütem national market atongtsü asoshi lenmang tajung adoktsü ta metetdaksü.

Maneni, technical session nung Aatmanirbhar Bharat Abhiyan kübok Pradhan Mantri formalization of micro food processing enterprises (PMFME) scheme indang nung ajemdaker PMFME Scheme, Directorate of Industries & Commerce, Nodal officer, Mhasiphizo Michael Khezhie-i jembia liasü.

PMFME scheme dak sendakba nung NEH Region atema maongka balala indang Joint Director, ICAR-i metetdaksü. Kasa mapang, Food Processing Sector aser financial schemes nung business maongka indang Assistant Manager, NABARD, Nagaland ajanga metetdaksü.

Tara Sutaria dak Covid-19 putet



Mumbai, Tsüklai/March 13, 2021 (Agencies): Bollywood actress Tara Sutaria dak coronavirus tashidak putetogo. Tang industry nung tesüsa coronavirus tashidak puteter rongnung Tara alitsü, ta Filmfare

sangdong ka ajanga metetdaksü.

Tawa, Tara-i la indang film tasen - Tadap tangokoba maparen renemtsüogo. Iba film nung Suniel Shetty'er jabaso Ahan Shetty-i Bollywood nung ajemoka mezüing shilem agiba angutsü.

Manoj Bajpayee dak coronavirus positive putetba sülen, tang Tara dak iba tashidak puteter alitsü. Manoj ya par kidang quarantine süa mungdar, ta Hokolbarnü Manoj atema otongdar ka ajanga metetdaksü.

Bajpayee indang otongdari ashiba agi, taoba ita Kanu Behl-i direct asüba film - "Despatch" atema actor Manoj dena tangoka liasü; aser Kanu dak COVID-19 putetba sülen pa dak iba tesashi wara aliba

tendangtet.

"Manoj Bajpayee-i 'Despatch' film tangoka liasü, koba Ronnie Screwvala-i produce asütsü aser film director dak COVID positive putetba sülen Manoj-a iba tashidak putet. Tang Manoj Bajpayee mozü agia anepaludar aser pa temang tajungba lir. Tekümdangtsü mera ajak nung anidaka Manoj ya par kidang quarantine süa mungdar," ta arishi küm 51 tain actor indang otongdar sangdong ajanga metetdaksü.

Maneni, Brehostibarnü Maharashtra State nung nisung 14,317 dak coronavirus tashidak tasen puteta liasü. Taküm, iba state nung Brehostibar anogo Covid-19 tashidak putetba ya timtiba alitsü.

Taoba mapang BJP lenir tain...

Atal-ibo ajak dendaktsü saka tang aliba sorkaribo mesüzüker mesüra amokmerener," ta pai ashi.

Pai kechiba TMC nung adentsü lemtet, ta asüngdangba langzüdang Sinha-i, "Nandigram nung kari Mamata yirutsüba sülen ni TMC nung adentsü aser Mamata yaritsü telemetba agia liasü," ta ashi.

Tamil Nadu assembly election atema DMK-i party manifesto saya

Chennai, Metsüremi/March 13 (Agencies): Tamil Nadu nung assembly elections agitsü mapang ana nung lia Honibarnü DMK-i party manifesto ajanga gari totzü aser mamatzü jenjang ajemtsütsü, LPG atema subsidy agütsütsü aser state nung Tamil nung atema mapa shilem 75 wazüka yutsütsü nangzükogo.

DMK Tir, M.K Stalin-i tenangzükba 500 aliba manifesto nungi tenangzükba 50 metetdaksüdang pai, election nung takok ngura party-i petrol litre shia sen 5 aser diesel litre shia sen 4 ajemtsü, LPG cylinder



shia subsidy sen 100 agütsütsü aser Aavin company-i agütsüba mamatzü litre shia sen 3 ajemer agütsütsü, ta metetdaksü.

Kibong shia tetsütem nem ita shia sen meyrjang kaka (1000) agütsütsü aser city bus nung angati senzüdaktsütsü; sorkar school tem nung azünger kaketshirtem nem mamatzü angati agütsütsü aser college shisaliok atema agiba loan sentsüh atoktsü; ration card alir ajak nem Covid-19 allowance sen 4,000 agütsütsü aser tang wara nung ajemdaker kiojen tax

(Tapak 7 nungi...)

matutsü, ta party manifesto nung nangzüka lir.

DMK-isa mapa lakh 2 adokdaksütsü aser sorkar department balala nung mapa tazüing aliba ajak nung nisung shimoktsü, ta nangzük. Party-i state nung mapa shilem 75 bo Tamil nung nem agütsütsü aser nija sector nunga Tamil nung nem mapa wazüka yutsütsü, ta nangzük.

DMK ya Hindu nung anemba party ka lir, ta tangari aitsüba nung ajemdaker party-i Kumbabhishekam tekülem ki yanglushitsü atema sen crore 1,000 agütsütsü, tenemlen aliba tekülem kitemi atutsü atema gari service agütsütsü aser linük nung Hindu nung temeshi aini aotsü atema nisung lakh 1 nem nisung shia sen 25,000 agütsütsü, ta nangzük.

Stalin-i, "DMK-i nangzükba ama shidak inyaktsü aser onoki inyakbaji sangdongtsü. Onoki manifesto nung tenangzükba 500 inyaktsü atema programme implementation ministry ka tentettsü," ta metetdaksü.

MULUNG NEN O

Ajungben yipru aru ama iba alima nungi onoki teti meima aliba asür **Molodongba Ozukum** (Mongsenyimti) asüku anogo nungi tenzüker lokomong anogo tashi nung telok balala, kija kibong ajaki nübu, rongsen, shisatsü aser sarasadem agi ozü den lemsatep nung tepang agi mejembitet pelaba nenok ajak dang lemsateper.

Talisa item dang kanga pelapa lemsateper.

- Hon'ble Minister Tongpang Ozukum PWD (H/M)
- Amenba Yaden MLA.
- Kohima Ao Baptist Arogo.
- Staffs of Department of Information and Public Relation.
- Kohima Mongsentyimti Senso Telongjem.
- Maongtemjen Zunga Kohima Unit.
- Nokojungba Aso Ozukum Kohima.
- Changtongya Senso Telongjem Kohima.
- Kohima Kangtsung Senso Telongjem.
- Langpangkong Senso Telongjem Kohima.
- Kohima Longkong Senso Telongjem.
- Kohima Chuchuyimlang Senso Telongjem.
- Neighbours, Relatives and Well Wishers.

Temeim Kinungtsü, Jabaso, aser Kinungertem.

31.05.1979 - 03.03.2021

India nung Ford EcoSport SE saya

New Delhi, Metsüremi/ March 13, 2021 (Agencies): Ford India-i 'Ford EcoSport SE' ta nüngja agütsüba EcoSport SUV indang variant tasen ka India nung sayaogo.

EcoSport SUV variant tasen - Ford EcoSport SE petrol model jenjang sen lakh 10.49 aser diesel engine option jenjang sen lakh 10.99 (ex-showroom) alitsü. Ford EcoSport SE tereprangtsü EcoSport model tem ama lir, koba America aser nd Europe shishilembadak rear-mounted spare wheel medeni yokdar. Iba dak alia, gari engine ya EcoSport ama alitsü, koba India shishilembadak teyokdak lir.

"Tawa tanü customer temi gari design aser tereprangtsü tem tajungtiba sapua aliteper aser tanga dang nungi alakteta junga anguba nükshir, koba EcoSport SE ya tatishitsü ka lir," ta Ford India Marketing, Sales & Service, executive director, Vinay Raina-i ashi.

Iba gari tesülen dual-tone bumper den silver-finished faux skid plate tasen inoka yanglutsüogo. Ford-i ashiba agi, EcoSport SE nung 'easy to use puncture kit' ka angutsü, koba ajanga gari kiburtemi minute ishika tsüngda mopung orr aliba gari tyre magizüki ayong ayonga yanglutettsü.

EcoSport SE ya Titanium Trim nung angutsü, kong feature talisa Ford indang Sync 3 infotainment system den Apple CarPlay aser Android Auto support den Ford Pass app integration dena lir.

Item dak alaka, EcoSport SE gari ya 1.5-litre three-cylinder TiVCT petrol engine aser 1.5-litre TDCi diesel engine ana nung angutsü. Petrol engine ajanga 122 PS power aser 149 Nm torque agütsür. Ano külen, 1.5-litre TDCi diesel engine ajanga 100 PS power aser 215 Nm torque agütsür. Engine anaprongla nung five-speed manual gearbox dena lir.

India nung Acer Nitro 5 (2021) Gaming Laptop saya

New Delhi, Metsüremi/ March 13, 2021 (Agencies): Taiwan indang tech company Acer-i India nung "Acer Nitro 5 (2021)" ta nüngja agütsüba gaming laptop ka sayaogo.

Acer Nitro 5 nung Nvidia GeForce RTX 30-series graphics dena lir, koba iba ama feature aketba laptop ya India nung mezüing alitsü. Iba laptop ya 10th Generation Intel Core processor aser 32GB DDR4 RAM ajanga tashi agütsür.

India shishilembadak Acer Nitro 5 (2021) jenjang sen 89,999 alitsü aser iba laptop ya Acer exclusive stores, Acer Online store aser Amazon sabang ajanga angutsü. Ajisüaka, laptop ya sentsü ka - Obsidian Black colour nungang angutsü.

Acer Nitro 5 (2021) nung 15.6-inch full-HD TFT LCD display den 144Hz refresh rate aser 3ms response rate inoka yanglutsüogo. Laptop inyakyim tsütsü 10th generation Intel

Core i5 10300H processor den Nvidia GeForce RTX 3060 aser 6GB RAM ajanga achaayangtsür. Iba laptop nung 32GB DDR4 RAM, M.2 PCIe SSD storage atema slot 2 aser 2TB HDD storage angutsü.

Tanga feature tsütsü reprangdangra, Acer Nitro 5 (2021) nung 4-zone RGB keyboard den dedicated NitroSense Key, aser Acer CoolBoost technology angutsü. Gaming mapang, Acer CoolBoost technology ajanga laptop temperature tali mekümdaktsür.

Item dak alia, Acer Nitro 5 (2021) nung stereo speaker aser 720p webcam inoksema yanglutsüogo. Company-i ashiba agi, iba laptop nung 57.5Whr battery ya ghonda 10 tashi amshiteter.

Connectivity atema, Acer Nitro 5 nung Wi-Fi 6, Bluetooth 5.0, USB 3.2 Gen 1 port 2, USB type-C port aser USB 3.2 Gen 2 port angutsü.

Qatar Open: Rublev o Karatsev nati tebur tarep title kokogo



Doha, Metsüremi/March 13, 2021 (Agencies): Tesüiba ita ishika tejakdang, Aslan Karatsev aser Andrey Rublev nati pei pei tata kija asaya nung takok ngua shilem agia aruogo. Hokolbarnü ATP Qatar Open tebur tarep final nunga tena dak aketba sempet tajung sayua tebur tarep title kokogo.

Qatar ExxonMobil Open title akoktsü atema, final asaya nung, Russia nunger ATP Cup tebur tarep asayar yagi 7-5, 6-4 agi Marcus Daniell aser Philipp Oswald na tsükdaktsü. Iba asaya ghonda 1 ser minute 21 nung tembang.

"Tan agi ni tarep asaya title tanaben akoker alitsü, ajiasünung takok anguba atema

ni jangratema bilemer. Kasa tejangraba aser tasa amshia Dubai nunga asayatsü tebilemba lir. Taruba hopta asayamung atema ni tajungba renemtsü aser aruya aliba asayamung nunga ni takok ngua shilem agitsü teimla lir," ta Rublev-i ashi.

Iba ATP 250 masayadang, Karatsev aser Rublev na asayamung ka nung danga külemi asaya mali. ATP Cup nung tarep ama tenapronglai toktepogo, saka tena tamakok angu. Ajisüaka, tan asayamung final nung tenati set ka nung danga tamakok mengudangi title benogo.

"Iba takok ya tuluka lir aser ni atema mezüing ATP title alitsü.

Ajiasünung, iba title anguba asoshi jangratema bilemer. Iba den külemi tarep asayatsü asoshi Andrey Rublev ya asayar tetemjen ka lir," ta Karatsev-i ashi.

Russia nunger tarep, shirnoki final tongtettsü atema seed pezübuba Marcelo Melo aser Jean-Julien Rojer na tsükdaktsü, final asaya nung tenati break point pungo nungi break point 4 angu.

Rublev aser Karatsev nati 250 FedEx ATP Doubles Ranking point den senpet sen dollar - 38,470 lemsar Doha nungi aotsü.

Maneni, Daniell aser Oswald nati iba asayamung tebur tarep title mangu yongjia, ATP 250 tetenzük nungi tenati junga shilem agia asayaogo. Iba asayamung nung tenati Australian Open tebur tarep takok angur Ivan Dodig aser Filip Polasek na den külemi top seed Juan Sebastian Cabal aser Robert Farah na tsükdaktsüogo. Taoba küm, Sardinia asayamung takok angurtemi point 150 bendenlok aser tena tsüingda senpet sen - dollar 27,550 alemtsü.

Marseille ATP Open 13: Stefanos Tsitsipas tsükogo

Marseille, Metsüremi/March 13, 2021 (Agencies): Hokolbarnü, Marseille ATP Open 13 tebur kija quarter final asaya nung World no. 93 Pierre-Hugues Herbert-i Greek nunger world no. 5 Stefanos Tsitsipas tsükdaktsüogo.

Taküm, Stefanos-i Marseille ATP title tasembuba atonga takok angutsü teimla nung asaya liasü, saka tia makai pa iba asayamung nungi tukuogo.

Herbert, ya tarep asayar takoktet ka lir aser pai Australian Open semi-finalist Tsitsipas madak 6-7 (6/8), 6-4, 6-2 agi takok angu.

Arishi küm 29 tain Herbert-i külem France nunger Ugo Humbert den semi final asayatsü. Quarter asaya tanga

ka nung Ugo-i külem France nunger Arthur Rinderknech madak 4-6, 7-5, 7-6 (7/4) agi takok ngua lir.

"Semi final tongtetba ya ni atema tuluka lir aser 'top-five' jenjang nung alir asayar ka akokba ya mezüing alitsü. Semi final tongtettsü atema ni meranga asayatsüla ta kü mulung nung tejembiba ka ait aser bilemba ama tanü ni inyaktetogo," ta Herbert-i ashi

Top seed Daniil Medvedev, shibai Hombarnü Spain nunger Rafael Nadal melen ATP ranking nung jenjang tanabubai atutsü, pai 6-2, 6-4 agi Italy nunger arishi küm 19 tain Jannik Sinner tsükdaktsü.

Medvedev, shibai Tennis asaya tenzüker külen nungi title

9 tashi takok ngua lir, 2017 aser 2020 Marseille ATP Open quarter - final nung tsükba sülen taküm iba asayamung semi-final mezüing tongteter alitsü.

"Jannik-i ball ka danga mezüdoki tashi ajak agüja ball dak züklokja asayatsü meranger. Pa dangi zübazülema ball zükloktsütsüji lendong aser asen tera mekümdanger ta asüidang pai point angutsüsa ball ji junga aziükteta asayar," ta atptour.com dang Medvedev-i ashi.

Kasa asayamung quarter final asaya tanga ka nung World no. 287 Ebden-i 2018 küm iba asayamung akoksang Russia nunger Karen Khachanov madak 4-6, 6-4, 6-2 agi kokogo



Peren, Metsüremi/March 13, 2021: HQ IGAR (N) tawabangba kübok Jalukie Battalion indang Assam Rifles-i Bodhbarnü (10.03.2021) Pungalwa, Peren district nung "Fit India Run" sentong ayonga agiogo. Lisopur lanurtem tsüingda kati ka aria bilemstüba aser telongjem lidaktsütsü nükjidong yur AR-i iba sentong ayongzük. Nübur atema Security Forces-i iba ama sentong tajung ayongzüktsüba asoshi yimertemi Assam Rifles -Jalukie Battalion dang pelaba metetdaksü. Assam Rifles-i ayongba Fit India Run sentong nung lanur 32 agi shilem agiogo.

2nd MOKOKCHUNG TOWN INTER-WARD FOOTBALL TOURNAMENT OSANG:

March 13:

1st match: Mongsenbai Ward (4) - (2) Arkong Ward
2nd match: Tongdentsuyong Ward (3) - (2) Yimyu Ward
3rd Match: Dilong Ward (3) - (1) Salangtem Ward
4th Match: Sungkomen (5) - (0) Kumlong

March 15 (Hombar) match:

Artang Ward Vs Sangtemla Ward @ 11:00 AM
Alempang Ward Vs LijabaLijen Ward @ 12:30 PM
Majakong Ward Vs Aongza Ward @ 2:00 PM
Marepkong Ward Vs Penli Ward @ 3:30 PM

Asayadak Tesem : Imkongmeren Sports Complex Mokokchung



Mokokchung, Metsüremi/March 13, 2021: Mokokchung District nung saisapong tsütsü sempet tajung alir asayar tasentem ajungmesotsü atema, Honibarnü (13.03.2021) Assam Rifles indang Mokokchung Battalion-i saisapong oset balala lema agütsüogo. Assam Rifles-i mulungsoa saisapong osettem agütsüba ajanga saisapong sempet alir lisopurtemi saisapongtem meima aser pei sempet tajungba yanglushitsü asoshi tali ajungshitsü.

Womens Senior One Day Trophy: Punjab-i wicket 10 agi Nagaland akok

Dimapur, Metsüremi/March 13, 2021 (TYO): Honibarnü, Womens Senior One Day Trophy Elite Group - D nung Nagaland aser Punjab team tsüingda asaya liasü. Iba asaya Punjab-i wicket 10 agi Nagaland kokogo.

Toss koka Nagaland-i batting shim aser over 39.3 nung parnoki run 55 dang yanglur asayar ajak out süadok. Nagaland nungi asayar rongnung Kekhrienuo Rupreo-i run 19, Merensola-i run 8 aser Alemienla-i run 6 dang yanglutet.

Punjab bowler rongnung Komalpreet Kour-i wicket 3 out sütsü. Kasa mapa külem team pur Harpreet Dhilllo, Mehak Kesar aser Kanika Ahuja nungeri wicket anana aser BN Meena-i wicket 1 agi.

Tanabuba innings nung, Punjab team-i over 7.1 nung alizüing tongteta (run 56/0) liasü.

Punjab tetsür team rongnung Ridhika Aggarwal-i run 29* aser Jasia Akhter-i run 25* yanglutet.

Hombarnü (15.03.2021) Nagaland aser Madhya Pradesh na asayatsü.

March 29 nü 4buba Open Sekrenyi Air Rifle Shooting tokteptsü

Kohima, Metsüremi/March 13, 2021 (TYO): D.Khel Ground, Kohima village nung March 29, 2021 nü Kohima Rifle Club-i 4buba Open Sekrenyi Air Rifle Shooting Competition 2021 ayongtsü terenemba lir, ta sangdong ka ajanga metetdaksü.

Iba shooting tetoktepba ya category ana nung lemsar asayatsü.

Category anaprongla atema senpet sen telemsa yamai alitsü:- 1st prize - Rs.10,000, 2nd prize - Rs. 7000 aser 3rd prize -Rs. 5000.

Air Rifle Shooting tetoktepba atema entry fee ji sen 500 alitsü, ta asayamung ayongertemi metetdaksü.

Entry form ya Pfiinuo Pan Shop, DBS colony Kohima & Sports World, opposite Bank of Baroda, Kohima nung angutsü. March 27, 2021 tashi entry form bendentsü.

Iba asayamung dak sendakba nung osang tejangja metetpelatsü atema ph no. 8794507912, 7005429309, 9856569364 nung tongtepratepang, ta kasa sangdong nung shia lir.

BILEMDANGANG

"Tarutsü tia tajungba asütsü asoshi tanü meranga inyakang."